

Was merr su babbeld

Honnes? Honnes!
Was iss donn?
Du heerst widder nix!
Isch les Zeidung.
Doo konnsde doch emol zuheern.
Naa.
Wie naa?
Wenn isch lese due kann isch nitt zuheern.
Jetzt heer merr awwer uff!
Also, was hosde?
Isch soll derr enn scheene Gruß ausrischde.
Donkeschee. Ei vunn wem?
Ei vunn dem Monn mett de Kabb.
Ei ja. Vill Männer hawwe e Kabb.
Der hott su e kariert Kabb, den kennsde.
Kann soi, wie heeßden der?
Isch habben nitt gefroochd.
Awwer enn Gruß sollsde ausrischde.
Der Monn wohnt in de Grawestrooß.
Doo wohne vill Leit.
Du kennsden, su enn nette Monn.
Ah ja. Vunn dene duts aach vill gewwe.
Unn der babbeld gern medder.
Ooner vunn de Grawestrooß?
Dem soi Fraa iss e geborene Kaus.
Kaus, dem soi Fraa?
Ja, su e blond Fraa.
Wo hosden den Monn getroffe?
Ei grad ewe in de Kapellestrooß.
Wohnt der doo?
Naa, isch saach doch: in de Grawestrooß!
Unn vunn dem ...
... soll isch derr enn Gruß ausrischde.
Donn erklär merr mol den Monn.
Der hott aach immer die selb Jack oo.
Su e gelb? Donn waaß isch wers iss.
Naa, e blau Jack, meddere Kabutz.
E blau Jack? Unn e Kabb hodder uff?
Immer, e kariert Kabb.
Iss des enn kloone Monn?
Naa, enn gruße. Greeßer wie du.
Saach emol, fährt der su e rot Audo?
Isch seh den immer nor meddem Fahrrad.
Der hott enn Korb vorne uffem Fahrrad.
Den habb isch nie meddem Korb geseh.

Hm. Hawwe die Kinner, die Leit?
Ja, zwaa Buwe.
Wie alt sinnen die?
Der oone iss su alt wie unser Älst.
Also iwwer Fuffsisch.
Ja. Der iss bei de Feierwehr.
Der mette Kabb?
Naa, der Bub.
Isch glaab, isch waaß wen de moonst.
Den Bub?
Naa, den mette Kabb, der heeßt ... hm!
Awwer jetz waaßde wer dess iss.
Der meddem scheene Gruß? Ja.
Donn isses joo gut.
Awwer dem soi Fraa iss e geborene Knapp.
Knapp? Nitt Kaus?
Naa, Knapp, aus de Bohnhofstrooß.
Dere ihrn Monn iss schunn long gestorwe.
No ja, mir werrn den Monn schunn emol seh.
Wo donn? Mir giehn joo nitt fort.
Warsde in de Kapellestrooß odder nitt?
Ei ja, awwer ...
Siehsde. Unn jetz will isch weiderlese.

Eiern Honnes